

郭 说

说郭

說郛卷第四

墨娥漫錄 十五卷

風土記

越俗飲宴卽鼓盤以爲樂取大素圓盤以廣尺六者抱其著腹以右手五指更彈之以爲節舞者應節而舞

陽羨縣東有大湖中有包山山山下有洞穴潛行地中云無所不通謂之洞庭地脈

關中記

長安地皆黑壤城今赤如火堅如石父老所傳盡鑿龍首山土爲城又諸臺闕亦爾

鍾南山一名中南言在天中居都之南故曰中南

昆明池曰神靈沼堯治水訖停舡此池蓋堯已有池漢代因特深

廣之

河東記

博陵王崔元暉曾孫照大和八年九月中因疾死王追去至判官所有一大樓入門悉是金榜銀榜備列人間貴人姓名將相名列於金榜將相以下悉列銀榜更有長鐵榜列州縣府屬姓名

兩京雜記作崔浩

益州記

江由左擔道按圖在陰平縣北於城都爲西注曰其道至險自北來者擔在左肩不得度右肩也

益州城張儀所築錦城在州南蜀故宮號錦里雁橋東君平賣卜土臺高數丈

梁州記

武侯壘東南有定軍山入山十餘里有諸葛武侯墓鍾會征蜀至漢川祭亮之墓令軍士不得於墓芻牧樵采今松柏碑銘儼然

沔陽城在漢水南舊蕭何所築也劉備爲漢王權住此城盟於城下今門外有盟壇猶存

會稽記

餘姚縣南百里有太平山山形似繖四角各生一種木木不雜揉三陽之辰華卉代發縣東北六十里有土城山勾踐索美女以獻吳王得諸暨羅山賣薪女西施先教習於土城山山邊有石云是西施澣紗石

赤城山石色皆赤狀似雲霞縣霽千仞謂之瀑布飛流洒散冬夏不竭山內則有天台靈岳玉室璿臺

三齊略記

堯山在廣固城西七十里堯巡狩所登遂以爲名山頂立祠祠邊有柏樹枯而復生不知幾代樹也

臺城東南有蒲臺臺高八丈秦始皇所頓處在臺下索馬至今蒲

生猶縈似水楊而堪爲箭

始皇作石塘欲過海看日出處時有神人能驅石下海石去不速神輒鞭之皆流血至今悉赤陽城山石盡起立巖巖東傾狀如相隨行

荊州記

緣城邊隄悉植細柳綠條散風清陰交陌

雁塞北接梁州汶陽郡其間東西嶺屬天無際雁飛天欲雨輒聞鼓角簫管之聲

始興記

郡東有王山草木滋茂衆石澄澈

秦桂陽縣閣下鼓自奔逸於臨武因名聖鼓今臨武有聖鼓城也

南嶽記

衡山之岡有石室有古人住處有刀鋸銅錘及香爐

涼州記

呂纂咸寧三年胡人發張駿冢得玉簫玉尊玉笛瑪瑙鍾榼

丹陽記

江寧縣南三十里有慈母山積石臨江生簫管竹昔伶倫采竹嶰谷其後惟此簫見珍故歷代常給樂府而俗呼鼓吹山今慈湖成常禁采之王褒洞簫卽稱此也其竹圓緻異於衆處

齊地記

不夜城在陽建東南蓋古有日夜出此城以不夜名異之也

太康地記

并州不以衛水爲號又不以恆山爲名而云并者蓋以其在兩谷之間乎韓魏趙謂之三晉并冀二州是其地也

青州東方少陽其色青其氣清歲之首事之始也故以爲名雍州兼得梁州之地西北之位陽所不及陰氣擁闕故取名焉

奉高者以事東岳帝王禪代之處也故明堂在縣南四里漢武立大壇於東山以登天下示增高

豫章記

望秦縣有一石室入室十餘里有水廣十數步清淺遊者伐竹爲筏以過水幽邃無極莫能究其源出好鍾乳

松陽門內有大梓樹大四十五圍舉樹盡枯死永嘉中一旦忽更榮茂大興中元皇帝果繼大業

廣州記

廣州廳梁上畫五羊又作五穀囊隨羊懸之云昔高固爲楚王相五羊銜穀萃於楚庭故圖其像爲瑞六國時廣州屬楚廣州城北有馬鞍崗秦時瞻氣者言南方有天子氣始皇發民鑿此崗地中出血鑿處猶在

南康記

南康縣有歸義山去縣七百里下有石城高數丈遠望嵯峨靈闕
騰空故老謂之神闕

湘中記

九疑山在營道縣北山相似行者疑惑故名之

衡山近望如陣雲沿湘千里九向九背

衡山九疑皆有舜廟太守至官常遣戶曹致祀則如聞絃歌之聲
湘水至清雖深五六尺見底了了然其石子如擣菹大五色鮮明
白砂如霜雪

營水洚水灌水祁水春水永水來水米水淥水連水倒水瀉水伯
水資水皆注湘

荊州記

雁塞北接陽州汶陽郡其間東西嶺屬天無際雁飛翥至此卽回
翼唯一處稍下每雁飛達則矯翮裁度下處而過故名雁塞

武陵武陽縣有石帆山若數百幅帆

宜都西陵峽中有黃牛山江湍紆迴途經信宿猶望見之行者語曰朝發黃牛莫宿黃牛三日三莫黃牛如故

巴東有一折柱孤直高三丈大十圍傳云是公孫述樓柱破之血出枯而不朽

宜都記

自西陵泝江西北三十里入峽

山行周迴隱映如絕復通高山重障非日中夜半不見日月也

鄴中記

石季龍作雲母五明金薄莫難扇薄打純金如蟬翼二面采畫列仙奇鳥異獸隨扇大小雲母帖其中細縷縫其際雖掩畫而綵地明徹看之如謂可取故名莫難也季龍出以扇夾乘輿

石勒諱胡胡物皆改名胡餅曰麻餅胡荽曰香荽胡豆曰國豆

陳達妹才色甚美髮長七尺季龍以爲夫人

秦州記

金城郡漢元始六年置應劭曰初築城得金故曰金城

三秦記

秦名天子塚曰長山漢曰陵故通名山陵

潯陽記

潯陽城東門通常有蛟爲百姓害董奉疏一符投水中少日見一蛟死浮出

廬山西南有康王谷又有北嶺

襄陽記

黃承彥者高爽闓朗爲沔南名士謂諸葛孔明曰聞君擇婦某有醜女黃頭黑色而才堪相配孔明許卽載送之時人以爲笑樂里爲之諺曰莫作孔明擇婦正得阿承醜女

諸葛亮初亡所在各求爲立廟朝議以禮秩不聽百姓遂因時節私祭之於道陌上言事者或以謂可聽立廟於成都後主不從步兵校尉習隆中書郎向充等共上表於是始從之

世紀荀巨伯遠看友人疾值胡賊攻郡巨伯不忍去賊旣至謂巨伯曰大軍至一郡並空汝何男子敢獨止此巨伯曰友人疾不忍委之寧以我身代友人之命賊知其賢旋軍而還

番禺雜記

唐鄭熊

番禺二山名廣州昔有五仙騎羊而至遂名五羊

嶺表或見物自空而下始如彈丸漸如車輪遂四散人中之卽病謂之瘴母

海邊時有鬼市半夜而合雞鳴而散人從之多得異物

西京雜記

祕書省監號宰相病坊少號給舍病坊丞大著號省郎病坊祕書

郎及小著號察官病坊

李藩未第有僧告曰公是紗籠中人藩問故曰凡宰相冥司必立其像以紗籠護之藩後果至台輔

進士放榜後須有一人謝世名報羅使言報大羅天也

都省都堂門外大槐謂之音聲樹欲除拜僕射則此槐必有聲如歌曲

大赦於金雞口銜敕宣政衙鼓樓上雞鳴六人至日同以索上雞竿爭口中敕爭得者月給俸三石謂之雞粟

京兆尹新上老吏多於石橋上看行馬以下其行事若上橋馬行速此尹必善若馬行滯此尹必嚴惡甚驗

廬山記

宋陳舜俞

青湓山有井形如盆因號盆水城曰湓城浦曰湓浦江州故有湓江

匡俗先生姓匡名俗商周之際遜世隱居廬於廬山故曰匡廬
吳郡太守張公直過子女觀祠婢指女戲神像公直夢神致聘怖
而遽發中流舡不行其家人驚曰豈愛一女令闔門受禍公直不
忍其妻遂以兄女代之公直怒曰吾何面目於當世復下己女於
水中而將渡遙見二女於岸側旁有一吏曰吾廬山君主簿敬君
之義悉還二女皆無患

青城山記

青城山一名赤城山一名青城都一名天國山亦爲第五洞寶仙
九室之天羣峰崦互相連接靈仙所宅祥異甚多

福地記云青城山高三千六百丈周圍五千里有甘露芝草天池
醴泉

青城觀北上十餘里有亭臺孤聳獨秀霞表名曰軒轅臺下望山
如螳蛭焉連抱之樹有若薺也此臺非得仙之人不可居之

青城山觀前有靈燈齋日必見或五或六亦無定數嘗因玄宗敕道士王仙卿就黃帝壇修醮其燈徧山僖宗幸蜀之年山中修靈寶道場周天大醮神燈千餘輝灼林表

嵩高山記

嵩高山下岩中有石室中有自然經畫自然飲食

嵩高山上有石室前有石柱柱上有石脂滴下人服一合得仙
嵩山東北有牛山其山多杏至五月爛然黃茂自中國喪亂百姓饑饉皆資此爲命人人充飽而杏不盡

華山記

華山高岩四合重嶺秀起上有石池北有石鼓老父相傳嘗聞其鳴山頂池中生千葉蓮服之羽化因名華山也

羅浮山記

羅浮者蓋總稱也羅羅山也浮浮山也二山合體謂之羅浮在曾

城博羅二縣之境舊說羅浮高三千丈七十石室七十長溪神禽玉樹之所在山中菖蒲一寸甘節

西征記

金鄉焦氏山數百里有漢司隸校尉曾峻冢前有石祠堂中四壁青石隱起自書契以來忠臣孝子孔子七十二人形像皆刻石紀之

嵩高山東太室西少室相去七十里嵩高總名也

洛陽建春門外迎道北有白社董威輩所住也去門二里白社有牛馬市卽嵇公臨刑處也

北征記

彭城城北六里有山臨泗水有宋桓魋石槨有奇石隱起龜龍麟鳳之形

柏谷谷邑也漢武帝微行至此爲老父所窘者也谷中無迴車地

夾以高原柏林蔭藹窮日幽暗殆弗覩陽景

華山對河東首陽山黃河流於二山之間聞本一山巨靈所開今
睹手跡於華山腳跡在首陽山下

山陽縣城北二十里魏中散大夫嵇康園宅今悉爲田墟而父老
猶謂嵇公竹林地以時有遺竹也

成都古今記

趙朴

張儀樓高百尺初張儀築城雖因神龜然亦順江山之形以城勢
稍偏故作樓以定南北

海棠樓李回所建以會僚佐議事裴坦爲之記

望妃樓在子城西北隅亦名西樓開明以妃墓在武擔山爲此樓
以望之

紅樓先主所建綵繪華侈初潁川人華洪隨先主入蜀賜姓王名
宗侃至是造紅樓城中人相率來觀曰看畫紅樓先主以爲應華